

UCAPAN PERDANA MENTERI DI MAJLIS PERASMIAN
KONVENSYEN UMNO NEGERI PAHANG, DI DEWAN
MAKTAB RENDAH SAINS MARA, KUANTAN
PADA 26HB MEI, 1980

Assalamu'alaikum Warahmatullahi Wabarakatuh.

Bismillahir-rahmanir-rahim.

Yang Amat Berhormat Menteri Besar merangkap Pengerusi Jawatankuasa Kerja Konvensyen¹, Ahli-ahli Yang Berhormat, Ketua-ketua Parti Komponen Barisan Nasional Negeri Pahang, Para Peserta, Tuan-tuan dan Puan-puan sekalian.

Alhamdulillah, syukur saya kehadiran Allah Subhanahu Wata'ala kerana dengan limpah rahmat serta izin-Nya dapat saya bersama-sama hadir di Konvensyen UMNO bagi Negeri Pahang pada hari ini. Saya ucapkan ribuan terima kasih kepada Jawatankuasa Penganjur kerana menjemput saya ke upacara yang penting ini dan memberi penghormatan kepada saya untuk membuat ucapan perasmian di Konvensyen ini.

Sebagaimana kita sedia maklum, Konvensyen yang diadakan ini merupakan satu orientasi baru dalam sistem pentadbiran dan perjuangan UMNO. Melalui konvensyen yang diadakan diseluruh negara, maka dapatlah UMNO menyusun strategi dan langkah-langkah perjuangannya secara menyeluruh dengan mengambil kira masalah-masalah setempat. Oleh sebab UMNO menjadi teras Kerajaan, pandangan Parti melalui Konvensyen yang diadakan ini adalah penting supaya dapat memandu Kerajaan di dalam merumuskan dasar-dasar bagi kepentingan dan kemajuan negara. Tiap-tiap ahli UMNO serta mereka yang terlibat di dalam konvensyen, hendaklah menjadikan konvensyen yang diadakan dari masa ke semasa ini sebagai satu forum untuk memperkukuhkan Parti dan meneruskan perjuangannya.

UMNO telah mencapai usianya 34 tahun pada 11 haribulan Mei yang baru lalu. Dengan usia ini, Parti kita boleh dianggap sebagai telah meningkat kepada usia belia-remaja yang matang. Keremajaan dan kematangan ini hanya dapat dibuktikan dengan orientasi dan corak pemikiran ahli-ahli Parti serta tindak-tanduk

¹ YB Datuk Abdul Rahmin bin Abu Bakar.

dan amalan mereka di dalam perjuangannya. Ini adalah cabaran besar kepada kita semua sama ada kita memegang jawatan pemimpin di mana-mana peringkat atau menjadi ahli biasa, iaitu sama ada ahli veteran ataupun yang muda. Walau apapun kedudukan kita di dalam Parti, kita hendaklah meletakkan kepentingan Parti dan perjuangannya di atas segala-gala yang lain.

Tuan-tuan dan Puan-puan sekalian,

Sebagai ahli Parti, kita mestilah sentiasa ingat bahawa amanah yang kita pikul adalah berat dan penting sekali. UMNO sebagai sebuah Parti yang mempunyai tujuan-tujuan seperti yang termaktub di dalam Perlembagaannya adalah menjadi tempat bergantung masyarakat Melayu khasnya dan rakyat seluruhnya. Melalui UMNO, negara kita telah mencapai kemerdekaan. Melalui UMNO juga, Perlembagaan negara telah digubal sedemikian rupa bagi melindungi kedaulatan negara dan semua golongan rakyat di negara ini. Amanah dan tanggungjawab meneruskan perjuangan bagi menjaga keutuhan, kedaulatan dan kemakmuran negara, mestilah dipikul bersama oleh tiap-tiap ahli UMNO dengan penuh keinsafan, perasaan tanggungjawab dan kewarasan fikiran. Ahli-ahli UMNO sebagai orang Islam, mestilah memandang amanah ini mengikut pengertian Islam tanpa apa-apa kekeliruan.

Saya suka menegaskan bahawa UMNO perlu dan mestilah menjadi Parti yang dianggotai oleh ahli-ahli yang berhati jujur dan bersih yang mementingkan perpaduan dan mempunyai semangat perjuangan yang gigih serta luas. Ini hendaklah menjadi pedoman dan pegangan semua ahli UMNO, sama ada mereka menjadi ketua atau yang bakal menjadi ketua, mahupun ahli-ahli biasa. Tiap-tiap seorang daripada kita adalah diamanahkan untuk memperjuangkan tujuan-tujuan Parti dengan berlandas dan berpandukan kepada cogan kata UMNO iaitu, "BERSATU, BERSETIA DAN BERKHIDMAT".

Keutuhan UMNO dan pencapaian segala matlamat perjuangannya hingga ke hari ini adalah berdasarkan kepada semangat perpaduan yang dipelihara dan disanjung tinggi oleh tiap-tiap ahlinya. Perpaduan ini dengan semangat serta disiplin untuk setia kepada kepimpinan yang jujur dan dedikasi dalam perjuangan dan sikap sedia untuk berkhidmat kepada masyarakat dan negara telah mendapat kepercayaan masyarakat Melayu dan bangsa pada keseluruhannya.

Tuan-tuan dan Puan-puan sekalian,

Kejayaan UMNO hingga ke hari ini boleh dibanggakan oleh tiap-tiap ahlinya. Kita hendaklah sentiasa berhati-hati kerana keutuhan dan perpaduan Parti yang sentiasa diberi keutamaan oleh kita semua telah menimbulkan irihati di setengah-setengah pihak dan golongan. Golongan-golongan ini sentiasa berusaha untuk melumpuhkan UMNO dengan berbagai cara dan cuba mencari peluang untuk menimbulkan kekecohan dan pergeseran di antara ahli-ahli Parti. Kita hendaklah sentiasa berwaspada kerana ada kemungkinan juga musuh-musuh Parti kita hendak memperalatkan kita untuk menimbulkan perselisihan antara kita sesama sendiri. Musuh-musuh UMNO sentiasa menunggu keretakan yang akan berlaku di dalam Parti kita untuk bertindak bagi memusnahkannya.

Sebagai sebuah Parti yang menjunjung tinggi prinsip demokrasi, UMNO sentiasa mengalu-alukan kelahiran pemimpin-pemimpin yang bakal mewarisi kepimpinan yang ada sekarang ini. Perjuangan tanpa memikirkan sumbangan kepimpinan dari masa ke semasa akan melemahkan Parti. Proses kelahiran pemimpin haruslah mengikut prinsip demokrasi dan landasan disiplin supaya keutuhan Parti tidak terjejas.

Pada akhir-akhir ini kita telah berhadapan dengan beberapa kekecohan yang berlaku di dalam pemilihan Ketua-ketua Bahagian UMNO, yang menunjukkan unsur-unsur yang tidak sihat telah mempengaruhi sebilangan ahli-ahli UMNO. Tuduhan membeli jawatan dan pengaruh jika benar, adalah satu perbuatan yang tidak berpancaindera amanah seperti yang saya sebutkan tadi. UMNO memerlukan pemimpin-pemimpin yang jujur dan ikhlas yang berjiwa rakyat dan yang menyanjung keluhuran undang-undang dan kedaulatan negara serta bersedia dan sanggup memperjuangkan kepentingan rakyat dan negara. Kita sebagai ahli-ahli UMNO tidak harus membiarkan mereka yang tidak mempunyai sifat-sifat ini untuk memegang jawatan dan mempengaruhi Parti. Sekiranya ini berlaku, UMNO akan hancur dan yang salah ialah ahli-ahli UMNO sendiri kerana membenarkan diri mereka diperguna dan diperalatkan oleh pihak-pihak itu.

Tanggungjawab untuk menghalang berlakunya perbuatan yang tidak sihat di dalam UMNO adalah terletak di tangan tiap-tiap ahli UMNO. Bagi bakal-bakal pemimpin yang ingin merebut jawatan-jawatan penting di dalam parti, mereka hendaklah

mengukur diri sendiri dengan sifat-sifat yang telah saya sebutkan tadi. Ahli-ahli UMNO pula hendaklah menilai sifat-sifat yang kita perlukan itu sebelum memberi undi kepada seseorang bakal pemimpin. Janganlah hendaknya kita jadikan Parti UMNO sebagai sebuah Parti yang boleh dijual-beli yang boleh diperalatkan oleh golongan-golongan itu untuk kepentingan-kepentingannya yang sempit.

Ahli-ahli UMNO hendaklah yakin bahawa rakyat akan terus memberi sokongan kepada UMNO sekiranya UMNO dapat mempertahankan keutuhan dan perjuangannya dan selagi pemimpin-pemimpinnya di semua peringkat dapat membuktikan kejujuran dan semangat perjuangan Parti. Kita tidak harus membiarkan seseorang pemimpin atau ahli mencemarkan nama baik Parti. Ingatlah kepada pepatah: "Sebab nila setitik, rosak susu sebelanga". Oleh itu, jaga dan peliharalah kehormatan dan imej UMNO.

Tuan-tuan dan Puan-puan sekalian,

Negeri Pahang merupakan sebuah negeri yang mempunyai sumber-sumber kekayaan yang dapat dimajukan untuk membawa kemakmuran kepada rakyat negeri ini dan negara amnya. Projek-projek pembukaan tanah dan penempatan penduduk telah dijalankan dengan pesatnya. Kerjasama di antara Kerajaan Pusat dan Kerajaan Negeri yang erat telah membolehkan berbagai program dan projek pembangunan dilaksanakan. Usaha Kerajaan Negeri untuk meningkatkan kemajuan perindustriannya serta lain-lain lapangan telah menunjukkan hasil yang memuaskan. Dalam hal ini, Kerajaan Pusat akan terus memberi sokongan dan kerjasamanya bagi membolehkan program dan projek pembangunan di Negeri Pahang dapat dilaksanakan dengan licin dan berkesan.

Kerajaan mempunyai tanggungjawab untuk memaju dan membangunkan negara bagi faedah rakyat terutama sekali mereka yang daif dan golongan yang berpendapatan rendah. Dalam menunai dan melaksanakan tanggungjawabnya, Kerajaan sentiasa menghadapi berbagai cabaran akibat keadaan politik dan ekonomi antarabangsa. Di samping itu, kita juga masih menghadapi masalah keselamatan. Tiap-tiap ahli UMNO khasnya, dan rakyat amnya, hendaklah insaf tentang keupayaan Kerajaan untuk membawa kemakmuran dan kesetabilan kepada negara. Hasrat dan cita-cita Kerajaan untuk melaksanakan dasar-dasar yang mendatangkan faedah kepada rakyat dan negara akan menjadi

kenyataan dengan mudah sekali sekiranya semua pihak dapat memainkan peranan mereka secara membina. UMNO sebagai Parti yang mendokong Kerajaan hendaklah memupuk dan menjaga keutuhan Parti supaya ia menjadi benteng dan teras yang kukuh. Sebagai Presiden UMNO, saya menyeru semua ahli UMNO supaya jangan ghairah dan melupakan perjuangan Parti. Mereka hendaklah bersatupadu serta bersama-sama memperjuangkan nasib masa depan rakyat khususnya orang-orang Melayu dan golongan yang kurang bernasib baik.

Proses pembangunan di Negeri Pahang sebagaimana juga di seluruh Malaysia, memerlukan kestabilan politik, kegigihan dan kejujuran pemimpin-pemimpin di semua peringkat. Ia juga memerlukan kemampuan rakyat untuk berusaha dan menggunakan kemudahan-kemudahan dan peluang-peluang yang diadakan oleh Kerajaan. Saya harap dalam konvensyen ini para peserta akan dapat memikirkan dengan sedalam-dalamnya peranan ahli-ahli bagi memperkukuhkan Parti serta memperjuangkan matlamat UMNO bagi masa-masa akan datang di samping memikirkan peranan rakyat dalam pembangunan. Saya yakin ahli-ahli UMNO pada keseluruhannya dapat membuktikan kematangan UMNO sebagai Parti yang boleh memegang teraju Kerajaan pada bila-bila zaman dan mampu menghadapi semua cabaran.

Akhirnya, saya mengucapkan ribuan terima kasih dan tahniah kepada semua pihak yang telah memberikan kerjasama dan sokongan mereka dalam menjayakan Konvensyen ini. Saya percaya Konvensyen ini akan melahirkan buah fikiran serta cadangan yang bernas dan membina bagi membantu Kerajaan di dalam usaha-usahanya membangun serta menjamin keutuhan dan kemakmuran negara.

Tuan-tuan dan Puan-puan sekalian,

Dengan ini, saya dengan amat sukacitanya merasmikan konvensyen ini.

Terima kasih.